

煙霞萬古樓文集

煙霞萬古樓文集卷五

秀水王曇仲瞿氏良士

爲吳江紳士呈請故贈光祿寺卿浙江按察使司前鞏秦階兵備道王翠庭公遵新例於本縣建昭忠祠狀

竊死有五節獨疆場之餘勞爲足書記有七名惟祐主之無歸爲足卹故祠官經典以能死勤事者入昭忠郡縣章程以別建專祠者著令甲紳士某等授周官旁招堂贈之禮引鄉社族厲鬼歸之法有故 贈光祿寺卿浙江按察司前鞏秦階兵備

賜進士出身兵部車駕司主事王某籌軍驍道裴革隴西一葉身輕 皇上已子之葬而予之祭九層天大 聖恩復贈

以廕而贈以卿努力酬知竭誠奉職 制詞之龍光也見危

授命臨難捐軀 溫綸之敷錫也其嗣子某捧 璽書而

泣血淚盡眶枯其嗣孫某承

懿詔以受官天遙地重是何

敢於窮泉雨露之外再乞馨香幽光日月之中復求毛血獨是熊光哭墓少尺地以廬其子孫韓弇死邊無一費以藏其匱主不崇社祭則樂公之餒何歸不立叢祠則桐鄉之魂無託某等是敢粗具見聞略摭行實丐恩節府待命臺司初光祿承

上命備兵鞏昌也洮以外雷公飛燕之妖秦以內牛角羝根之賊光祿疑以傳車走六百里書而一馳負三十日食則不若舍張綱單軺就杜周一馬掛不疑櫺劍脫暴勝綉衣直覘賊壁殺門竟揖將軍霸上大府松公筠署光祿爲徽成軍需總事於時也民有掉屮杷土之勤官無藁稅穀租之供茹陂七處咸慮攻瑕碎馬什羣皆來就草鞏昌之守或以爲軍興費大疑鄧隲之在涼州地險山多恐鄭莊之遠千里光祿乃告大府省糧臺啟

元戎撤調劄故其守岷洮二城也。椹乾瑩豆盡爲軍儲。魚膏草
苦皆資戰備。甘境之賊爲藍線白線。僞竄無定。光祿以爲不編
魚陣。則蓋勲莫殲羌人。但寫孝經。則宋梟豈辨隴賊。遂乃求臨
淄之弩兵。募煎靡之勇。將火矢五十爲排。馬士一千成隊。摻匿
人於舫中。計殺賊於功簿。檄三郡二十一縣得民兵八千餘人。
凡一切解仇交質之豪。弛刑應募之衆。倉頭廬兒之厮。白虎揚
威之校。莫不出。魏尙私錢以買犒牛。設虞誦三科而賞壯士。光
祿又遠修斥堠。內壁堅營。木樵澗壘之堡。中周虎落之樓。尺藉
伍符之書。蘭石渠答之器。不半月。中成二千所。兩當之戰。賊帥
張漢潮由鳳縣攔入。光祿衷甲抽戈。囊韉負鉞如馬融之假部。
號犇命。西羌似文聘之隊。一軍親當石梵。或賊去三舍。或虜來
十步。或持重如韓安。或力戰如張羽。賊又偵伺糧臺。窺覩成縣。

率烏合二萬圍城門三日光祿偃旂臥鼓示之活門拔旆投衡
蹙之死地及賊之疑則又潛出環槍捷被慶甲斷田疇平岡之
碛署國淵首級之簿當此之日擊長離而諸羌散逸抱罕而涼
州平者以光祿八千鄉勇爲長城也秦階地連川陝大營五六
處官兵十餘萬流寇所竄追軍所屯時或賊壘居內官營處外
光祿乃明脩流馬暗餉陳倉冒程昱之膽送鍾會之馬蜀中方
一日而十驚峻軍乃十道爲一部知公武者謂王脩必冒難而
來笑公文者謂孔融乃成軍而出光祿有募士王元佐者西和
鄉貢生也生能挾輜死猶繫足實南入之男兒爲史慈之名士
死之日曰我從張睢陽乎無負嚴將軍也識者謂子桑知人曰
季舉士無以過此嘉慶某年軍功上計

皇上命爲浙江按

察光祿自以未殲餘醜必靖羌涼且大府以慶忌爲爪牙官恐

惶中有重腿疾乃遮劉勳以安部曲留杜畿以鎮河東光祿於
是繕平涼州邑之壁置流民棲宿之所給牛犁籽種之資脩掩
駘埋蒿之政或疑于禁鬚蒼葛公食少則光祿已於五年二月
伏羌觀病然猶覆頭柏孝負大盾而習勞擁膝高柔抱文書而
臥看伏枕之日口占朱博檄文夜問黃麗星象直至七亡七死
之時猶操九拒九攻之算到十舉十危之地尚畫三沮三仞之
謀及自知不起人說彌留始乃召丞椽爲先令書呼長子爲鑿
楹語也巢門有鳥雖張瓘自知死期夕陽在亭豈楊震竟無歸
魄况乎豫州百姓尚爲陳寶圖形焉有梓里九親不見倉慈畫
像今其嗣子通判某寄居吳江本族名爲士著實則寓公抱胡
公之祭器俎豆無家載木主之先君衣冠無廟伏蒙 皇上
賜有恩卹銀兩尙畱公庫未紉私囊可否馳牋上臺下牒本縣

卽君父貨死之金錢爲臣子藏衣之夾室卽叔敖期思之首卽
爲石相棲神之泊宅乞於吳江縣境擇地一區置王光祿專祠
一所以神主祔升昭忠祠忠臣勿祀魂則在羌湟水中大招若
來鬼不死玉門關外

舒鐵雲姨丈瓶水齋詩集序

沈李昌谷於溷神之中寄劉公幹於鬼伯之口微之未死託遺稿於香山荀攸臨終交阿鶩於鍾會良士自大梁來揚而吾姨丈人之集成於眞州昔宋考功毒希夷而有其佳句齊邱子沈譚峭而有其化書若巴樸園觀察之敦命剛工與刊傳作何遜卒而王僧孺集其文崔浬死而裴耀卿纂其集爲千古尙也我姨丈人位才備八厨身行萬里於粵則愛鐵雲之山於黔則樂飛雲之洞故其詩千巖競秀萬怪惶惑趙雲菘八十而願以詩師梁山舟九十而見其書拜其實錄也王筠見沈約不謂遲暮逢君劉頌見張華豈信人間有此蓋讀書數倍於前輩宜積薪居上於後來嘉慶二年借我備兵叔馳驛軍營值齊王氏火燒朱鎮而西時也師漏多魚翁驚失馬入黔貴則南籠方圍馳楚

壁而襄樊正急間道則經烟塵六十四路而遙遇敵則會相州

九節度師而戰湖督

汪文館新

假我叔氏勝軍三千以田悅之親家

分猗廬之餘卒與先生一鞭一筆九拒九攻纔及貴境而雲南
土練藤甲諸軍悉隸麾下婦人作賊馬援之所能平女子從軍
李廣之所不將而時所部女官土司龍囊仙者馬上桃花木蘭
火伴寵以妹喜之男冠假之教曹之鼓蓋壁其軍於水倒流山
也斬龍仙則惟擁二矛禽史歸而僅馳七騎從先生之計又更
舊將以易夷兵變撤章而改番服不旬月間而女賊王囊仙致
於麾下與義之戰以李典步騎八百破吐番寧州三萬力追銀
鼓生擒鬼章論功者謂督部仄囊火馬之功實本道輸攻墨守
之奇也南籠圍解我叔氏以前官左降復介君於湖楚軍營者
五載急攻則種下濃書緩戰而圍城作賦杜暹州紙豈止百番

謝公庫賤殆將九萬房元齡軍書之奏駐馬皆成令狐楚白刃

之中揮毫不輟大府初以君奏留黔中而介推逃賞魯連辭功

賦櫻桃爲林甫微辭

軍中作
冰山曲

詠蜀道與嚴公寓意要其賦性蕭

閒秉心引退示不願爲桓冲叅軍故託意作郝隆蠻語也叔氏

嘗語余曰吾貴州之行泣斬叛苗一百餘萬雖韓愈行軍不逢

裴度而令狐辟幕實得劉蕡蓋謂先生鄒枚之亞也八年癸亥

與良士結鄰吳中何蕭兩雋之巷張陸交讓之瀆既無貞白層

樓誰與戴公築室重陽風雨日日催租淞水菡鱸年年負米長

洲宋汝和觀察爲同人刻今雨集也屬良士刪鄭集之鷓鴣屏

謝詩之蝴蝶選取雄章多將百首其盛氣如孔文舉其博議如

劉子駿其貫串如酈道元水經注其磊落如司馬大人游獵賦

繫是時也趙嘏第論其詩細蔡邕已傳於京師愛君者焚宮中

媚香不識君者亦薔薇浣讀香山誦一首而女子價高康樂出一篇而洛陽紙貴無以逾矣古之工爲詩者或一卷擢第或一聯入相或一詩得黃門一詩得郎侍如先生者李泌蓬萊之閣王珪金炬之蓮國之光也而乃楊徽警句未登御屏公權法書不題殿壁生無花樹之居死乏西華之里嗚呼命歟性樂楷隸工李主錯刀法永公門限穿羽陽宮瓦寫老嫗扇頭其與人書也綠盆糊麪豈惟百函青泥封書每馳萬里棄陳遵尺牘爲榮得劉宏手書爲悅若良士之不嗜裝潢者亦復衣藏索靖之書帶秘鍾繇之札孔文舉謂舉篇見字欣然獨笑蔡中郎謂筆跡當面相見無期能無慟哉精音律工三絃亦習弄笙遯彈琵琶則鸛鶴立聽奏羯鼓而羣羊躑躅十四年己巳與太倉畢子筠華珍流寓京國作伶元通德吳剛修月數十齣微服聽酒樓之

歌重賂購樂人之價若王昌齡之旗亭次第李協律之流布管絃王門伶人爭爲猴演也素不賃車馬輿轎公卿名大夫或時訪其門館怡然不報單衣練布惟能晝眠散髮斜簪不標丰度竊以爲南州高士但見林宗江東步兵不推張翰先生之致貧乎高也淵岱之寶不盡延州之德不孤錢塘陳雲伯泊令子孟楷太倉蕭子山學相次第才各縱橫先卒之日紀其喪事購之歛之傳之序之而先生之哀毀滅性死孝傳矣夫詩小藝也好香山而死者爲唐衢膏少陵而飲者如張籍李洞鑄佛孫晟晝仙諒有人焉李益征人之作天下皆傳嵇康四言之詩愷之如晝君何不年而使後君死者沈子明刻李賀遺詩王士源爲浩然集序也時嘉慶二十一年秀水婁甥仲瞿王良士頓首拜書

唐陶山觀察傳疑錄徵事啓

國語證經。民謠著史。自公羊定傳聞之例。漆園發寓言之凡信。以傳信擇其尤雅疑則傳疑。見於他說是以韓非述事務乎兩存。鄒衍談天驗之小物。灑神人之墨汁。道德五千。駕使者之黃車。韜軒九百。皆有補於教化。實足資乎簡編。昔裴松注三國。盡輯異聞。景文作唐書。兼收小說。使汲冢不藏。紀年二代。幾無正朔。康成不探讖緯。五帝幾無名號。况乎神怪未明。桓子將欺。以獲狗浮夸。必斥劉氏。且昧夫豢龍。是知傳疑者。傳信之肴。蒸傳信者。亦傳疑之炙。穀也。且夫天道好還。風霆顯其至。教人心不死。冰雪表其精。誠匹夫匹婦。愚而神。一動一言。喪諸道間。火之所未。戴鄉老之所樂。稱若無徐廣。劉向之長篇。王粲戴逵之短部。將名湮於談藪。事闕於語林。抑亦有道仁人之所深惜歟。庖

丁輪扁柳梓韓圻五行方技之流二氏因果之諦名物象數鳥
獸蟲魚見智見仁可歌可泣卞壺整衿以爲禮法之文王衍揮
塵以爲清談之助郢書燕說誤亦可思笑鑠言鯖媿而善入則
譎趣勝於莊語讜論寓於庾辭矣至若伶元據通德微辭白帝
拾神童遺事乞嫖姚太乙之精求后土人部之夫未免房幃勸
褻卷牘誨淫文不雅馴摺紳先生之所難言也蒙也足蹇九垓
心眩八索筆墨僻於嗜竒文章耽於寓託玲琅邪釋郢之精悟
顛頂讀翽之繆賦蟬則文無二千徵貓亦事少七十苟非揚子
雲之鉛槧在懷左太冲之門潘皆設安能效匡鼎之解願隨聖
王之著脚此傳疑一書之所由作也是書也類無取乎區分文
勿嫌於累牘義主過惡而揚善辭貴微顯而闡幽不傷名教則
滑稽之雄也不惑異端則機鋒之妙也不及時政則野曝之獻

闕 俟見原稿再行補刻

虎邱建白太傅祠堂狀

伏考禮祭之法以能捍菑患爲功勞郡國之典亦得索鬼神而
祭祀以故陸雲去縣浚儀之俗祀其神石慶相齊卽墨之民配
諸社或以報功或以示本承而勿替矣吳郡鳧鴈爲鄉舊稱澤
國初時也范蠡闢長洲之濱地向龍宮子胥叱潮水之潮人離
魚府泊至黃歇城吳水分四縱韓臯布地波奠三江所由禳社
費連叢祠屋接五花樓下盡刻高公水政之文四絕碑中大書
禹鑿了溪之事固已祀法粗噉祭儀畧備已獨是香山一瓣空
題刺史橋名粉水千年未立江州祠廟如唐太傅白文公之刺
史是邦也太湖五宿有三年去郡之詩武阜兩壕開七里橫波
之路散龍口而築濤門灑彪池而通斗戶常使長干觀女盪花
市以川游大隄行人泛酒城而水戲設不塞海眼以金錢賂波

神以玉璧焉。知不地尙。陸沈山仍海湧也。嘗考昌黎訟早有懃
呵風伯之文表聖。懃霖有痛斥兩師之檄。是明神有吐食之嗟。
功德歸馨香之薦。歎公身尙。讜言史明直道。論河東入相。豈容
褻越平章。斥于頓。倭人不許。曲歸天子。且復奪中官兵柄。謂承
璫不可監軍。竦天下忠臣。謂奉國宜假節。度至今。讀虞人之戒。
字字忠言。當年詠新井之篇。人人忌口。夫豈但年尊九老人重。
鷄林祭倉頡爲文神。鑄閔仙爲詩佛也。已哉。按祭神二義。王充
主于報功祀事。十名許慎兼以會福公八灘手鑿六井。重爇想
當日虎山立碣。水號流。桑鶴市蒸隄洲。各種荻水功紀。在五湖
宦澤流諸三泖。豈可使白蛇廟壁弗題。魯峻碑陰黃水祠門不
建。李剛石室。今虎邱東麓有五賢祠者。但陳豆俎不述勤勞。亂
列衣冠無關祭法。且復西門靈館法宇。歆頽晉川涼堂神宮。侈

塲○若○非○郎○官○水○上○另○書○李○白○文○章○太○傳○湖○邊○別○塑○謝○安○神○像○是
何○異○沉○碑○峴○首○棗○羊○粘○於○荒○阡○作○廟○羅○池○屏○宗○元○於○瘴○海○昇○府
等○擬○於○塲○影○舊○園○建○白○刺○史○祠○堂○一○所○髣○司○馬○遷○夏○陽○覽○古○再
列○桓○楹○視○卜○子○夏○峴○谷○棲○遲○重○安○杵○白○庶○幾○樂○陵○墟○館○記○府○君
往○日○遊○神○瓠○子○金○隄○志○子○貢○舊○時○工○築○燎○牲○磔○犬○有○歲○常○豐○面
郭○臨○岡○無○堂○不○固○伏○懇○綿○田○桂○樹○榮○書○介○子○之○祠○木○主○石○龕○永
拜○北○君○之○廟○除○申○藩○臬○伏○乞○施○行

上達香圃尚書乞改名良士狀

竊惟烈士殉名君子疾沒是以顧雍佳士慕中郎之才而借名
鄧艾農人讀太邱之碑而改字名以立義孤而不更古之制也
曩待罪公車計偕選部又數年矣雲間日下恥士龍鳴雀之再
來四海彌天悲鑿齒道安之又至司馬公兒童皆識愧其相才
韓休伯婦女皆知焉能賣藥語曰避名名追逃名名隨非黃瓊
之名難副抑樊英之名太盛乎前者孟郊牀下累王維之一呼
賈誼小生誤吳公之謬薦於時服虔改姓畏師門崔烈之春秋
鄭元亡名懼帳下馬融之禮樂曩聞宋庠避讓以郊爲嫌趙岐
逃難以嘉爲諱茲之呈改舊名者非傳變之慕南容實劉備之
畏北海大部憐葛靚之義問自字仲思何居愛嘉貞之才恐他
日中書誤報是猶欲鄭君以籍名求官希楊朱以死名潤骨也

呼劉胡而止啼聞花卿而已瘡大部何望乎狀元之必中老夫
進士之不諱晉肅哉或者劉向更生辛文不死峴山再刻鴈塢
重題識狐篤之爲馬忠知范睢之爲張祿去戈則爲柳渾加日
則爲程昱安知滕曇恭之卽非曾子黃叔度之不爲顏淵乎慕
樂天者黃慕李白者碧如曇者力學髫年隳名中歲變范蠡以
陶朱豈忘功名改董蠻以仲舒自傷今昔伏惟大部俯准嵇奚
聽從疎東庶幾易杜牧之名白駒皎皎仍唐風之字良士瞿瞿
呼華陽貞逸山中知有隱居稱糞土愚臣朝廷識爲方朔謹狀

重脩潮海寺啓

朝。梧。啓。伏。惟。法。華。一。雨。是。地。皆。霑。毗。首。千。堂。無。金。不。布。能。以。一。
瓶。瀉。大。海。之。瀾。卽。以。甘。露。起。梵。王。之。國。是。在。法。王。大。力。無。容。咒。
鉢。呼。龍。而。在。越。土。檀。施。敢。不。髣。金。報。佛。阜。城。縣。潮。海。寺。者。始。唐。
貞。觀。之。初。越。宋。政。和。之。末。因。法。運。爲。廢。興。隨。世。輪。而。毀。立。方。一。
吹。而。成。世。訖。卽。五。變。而。化。劫。灰。至。於。今。也。蓋。已。古。矣。寺。爲。齊。右。
夷。庚。燕。南。使。候。利。竿。初。倒。在。乾。隆。癸。丑。之。年。彌。勒。當。來。逢。司。寇。
玉。公。之。至。因。決。獄。而。賦。東。山。乃。葺。舍。而。畱。南。國。時。也。飯。王。宮。裏。
正。讀。神。農。求。雨。之。書。防。風。國。中。忽。來。大。禹。騎。龍。之。駕。民。方。磔。犬。
而。弗。靈。公。乃。斬。龍。而。不。拜。爰。是。默。禱。天。神。靜。惟。佛。力。繞。牀。一。匝。
十。地。雄。雷。彈。指。三。聲。八。天。大。雨。遂。使。老。人。舞。國。不。殺。巫。庭。元。女。
下。天。得。收。妖。魅。人。謂。使。君。隨。車。之。雨。公。謂。仁。王。護。國。之。霖。是。冬。

大司寇胡公亦銜

主上之命往察東人之獄入瓦官破寺

讀靖康殘碑方停車而往初地亦秣馬而弔諸天目觀宿桑迦
釋土百風吹獻花文殊泥容露立慨楞伽化作荒山陀兜率鞠
爲漏澤遂欲以羯磨大斧重脩戰勝之堂且思以舍利餘灰再
起忉利之墟某士民長官佛天弟子既分符於一郡又受命於
兩公始擬以五十九年之炷爲萬八千功德之始而其時毒龍
作孽瓠子生波蕩鹿苑於尼河沉鷄山於香海幾使鷓鴣佛土
祇留大海一漚帝釋天人盡証水光三昧此給孤長老分金布
地之遲優闡賢王慕佛雕檀之晚者也今歲玉燭萬年人安俗
又金剛四位雨順風調某念前誓因緣感諸方護力爲大司寇
立頭陀之碣地利當興爲少司寇作喜雨之亭佛恩當報是用
工不魯輪匠呼宋墨爲法華造此世界與楞嚴改作講堂敢布

同官集腋成。分大力與。艱務使。母陀手。臂衆舉。而造天宮。勿須彌鼓。椎獨拳。而打大地。是序太凡。乃爲小引。善財五十三參之拜。佛佛書名。蛟龍七十二座之碑。人人暑號。

陳汾川封翁查太宜人雙壽序

雲伯大令攝崇邑之明年爲嗣君孟楷茂才得孫之三歲辰在
壽星汾川封翁暨查太宜人七十初度廉頗矍鑠高允聰強則
以爲美意延年則以爲修道養壽於是雲伯改集其詩文之自
序曰頤道堂者志實也崔瑗才華無非父業孝寬經史傳及孫
會昔三班以父子著述鄭元以孫祖傳經今元伯何如其父乃
仲弓又有童孫投分則元季兩難忘年則紀羣三世蓋自真人
東行以來所謂陳太邱有何功德而公不慚卿卿不慚長萃才
於潁川之一門也麥邱之祝宜有壽言壽人之女大難鋪序夫
薄宰相不爲則韋賢必以一經老矣爲天子不臣則桓榮必以
五世昌矣先生依記室而爲賢良列費員而工才語舉孔休源
茂才一策輾倒仲舒試杜正倫秀士五題驚翻楊素方且謂尙

書求我諫議得君。乃才辟四府而不薦。辛湯人求孝廉而弗舉。黃穆當李棲筠觀察浙西之時。有劉穆之日得百函之目。而無如馬周章奏不遇。常何張忠辟屬徒留孫寶。置崔駟於憲府。尚著白衣得陳琳於頭風。但居記室。非不知河陽節下。溫造道高。東海府中。潘滔才大。而先生切以仲由之負米。寧學嬰兒之不嫁也。以幕轂事尊甫膝下者數十年。或縣榻以待周璆。或立倦而見干木。爲鄒衍撤席。爲侯嬴執轡。爲蓋公虛館。爲田忌郊迎。而先生終不出百里之杭州。近料一門之家政。讀甄琛稅書手。相寬鹽法舉。種而作軍書倚馬。而成文檄。怡怡然曾參之事。親悵悵乎魚梁之不能奉母爾夫。不居經儒之名者。則必入循吏之傳。不登科名之錄者。則必列文章之志。韋夙逍遙不仕。而荆州之治。乃盛於世。康韋孟詩禮傳家。而郊廟之制。卒正於元成。

長君雲伯。張霸神童。徐陵才子。讀漢書五行俱下。問秘閣四部。皆通。文彥博舞象之年。侍尊人而監稅院。孝緒未官之日。書父紙於湖州。以故靈臺豹鼠之博。馬前七紙之書。莫不斧以天雷。速其文步。武平卽席七穆。三桓張華胸中千門萬戶。咸本父書。皆成家學。此洪公弼。寧海荷光祥。鍾邁。適司馬。沁光山。薄宦名命。溫公者。歟。察本郡孝廉。充旗生教習。徐孝穆玉臺之集。刻徧京師。白舍人百金之篇。流傳夷相。於時待詔則祿。養稽遲。棄襦則縣官可試。乃隨牒而至淮南。復量移而宰吳地。歷寶山常熟。上海奉賢。崇明五縣。彼號神君。此呼慈母。持衣嗅靴之民。板船海上。民樂官清之字。寫徧虞山。若固淮平使者。許留侯霸期年。潁川吏民能借寇君一歲。何至攀申徽者。百里不絕。遮五倫者。數里難行乎。昔齊樂預七十。老嫗擔榭葉而追縣官。梁蕭昱百。

歲嬪人扶曾孫而送太守史所謂鄧侯挽不來謝令推不去者
今有之矣。慕劉渙官清修其亭墓哀休屠母烈寵以鬻形不憂
雲漢之災竟獲鴻陂之利此皆樊遜清德之頌授之義方傳民
治縣之譜秉之家訓者歟。少文之孫必有宗慤种放之孫宜如
師道孟楷終軍弱冠白狼檠木之奇賈誼少年諸老先生之上
親師則蕭夫子之門牆取友則王離騷之名士才既大於陸機
書更多於袁豹若上滕王之閣必新庾信旌旗使賦阿房之宮
豈愧唐朝進士日者苟攸後事盡付鍾君楊恭門孤實憑張裔
非乃祖之慷慨交游作其俠氣也乎。七月十日先生生嶽越二
日查母悅辰蒙雙嘉耦天與比肩盤古夫妻同年壽考始而劉
凝車好簿笨同乘樊英婢來下牀再拜今則宣文講禮已興韋
氏之宗義成通經既啟清河之族七十年捐金讓水樂羊廉士

之妻五百里。責能雷池。司馬孟仁之母。注七篇女誡。不徒子嬪能賢。求仲將孤門。乃信冢孫有室。孟楷配汪氏。壽母之孫息也。幼擬離騷。長通班史。去貂蟬鬢髮。翩翩侍中。呼紅粉關圖。堂堂進士。詩則天寶。迴文錦則太平。環頌若非上官。玉尺才子。誰稱亦非及第。金釵狀元。誰配所謂。非此母不鍾。此子惟斯人。乃有斯嬪。歟。先生次君壽蘇。以生員無官。季子謙谷。以贊府奉政。女子一孫五。女孫四。曾孫一。閭閻如者。先生之福也。松喬彭朔。歲星住世之年。龍漢開皇。元始上元之紀。若祝尙父。以鈞璜頌彭。籤以斟雉。則非先生聰明老壽之本心。祖德一篇。隱居十賚。太史占老人之星。月惟孟秋。如來現壽者之相。祝公無量。謹序。

代華頂百五十茅庵乞米啓

爲天台湧泉庵
女士陳妙圓作

竊以德財並濟顯布施之六門。灑食兼資譯比邱之二義。泥連河六年行道亦須牧女調糜。奈羅城五衆安禪。誰化道人送食。天台者東旦之鷲峯華頂者南瞻之鹿苑也。獨是地隣奧壤。竝無分衛之家。宅接幽區。絕少行檀之主。無非窮子。萬二千法侶之多。盡是化城。百五十茅庵之衆。雖其炊砂作飯。道性能堅。煮石爲羹。色身難住。羅云法大食一菜而猶贏。迦釋功高咽一麻而必瘦。道中五漏。凡軀三禪。聖業放開。頭角託居士而譚元墮。落鬚。借現女人而說法。山中歲月只勤妮子針。功道外風情誰識。陵米價。邇者法糧同匱。香積同空。羅暎供衆。呵道輩爲夷齊。彌勤投齋笑。仙山爲陳蔡。甚者律明四分。無過午之頭。陋衣具七條。多呼庚之衲。子鷺魚聲裏坐成。有漏之因。飯版時中行。

誤。之果道中嚼湯誦咒時逢餓虎聽經洗盃聞鍾日見飢。

猿習。所望梵天托鉢假佛子之神通米汁流船借樹神之法。

力仁。起信誰非金粟如來善士生心卽是好施太子三旬九。

食人千僧應荷人緣七日一炊五百件誰非佛果宗風不墜無。

過困睡飢餐佛法無多祇此穿衣喫飯天台寺裏今朝鑿破砂。

鍋。蕪頂峯頭明日踏翻碓曰。

天台國清寺建五百羅漢堂啓

原夫真性無形無一形而不現法身無像無一像而不呈張八
教之網度法無邊立五行之門度機無量誘凡夫於天界觀金
色者發心憇小睚於化城見灰身者起信駕舩濟險雖四魔習
定亦成勇猛之軍秉炬通幽卽六賊歸真亦入大王之路阿羅
漢者十睚之始階三賢之初磴也宋太宗時曾敕造天台山羅
漢尊像五百一十六軀肇於雍熙之年奉于壽昌之日儀形古
矣志載存焉當時也鑄我脣百里之鐘度天下名童者十七萬
衆建釋迦舍利之塿脩龍門石佛者萬七千身旣而乾明院土
木之雄尊尊有號淨慈寺金銅之盛像像有名蓋不嘆學士之
手題隘以十六夫豈徒懷安之廣塑多逾八百者耶耀冶愚荷
智超迷蒙悟度力同蜩谷住七租之宗門功類蚊梯守九師之

教寺大悲有眼弘誓無肩希聖賢出處卽應身以體真身感龍
象與衰卽化相以參真相前者緝宮隨場頰青衣覆瀝神多紺
宇虺隤藉鴻福圓成人衆鎔金髹漆廿五有顯已光明團土雕
檀八十好儼然完備於時曇花亭下再覩山神造寺之年玉女
峯前重觀彌勒赴齋之日去年先師遺教指道場隙地爲壇今
春法衆興心延賢切諸賢爲會影隨形現登中峯者見文殊萬
衆而來響以音生陟曹山者感梵侶飛行而至斧羣山之一木
百棟可成畚衆土之一坯千尊可就廓莊嚴之境功德如林集
歡喜之緣慈悲如地唯是庀功非易冀萬善爲因依鳩力唯艱
仰一心爲成就儻或解囊戴事何殊貢水歸瀛如其輸篋程功
奚啻軀星助月刻日材聘嵩華匠追揚鄴麗窮圖繪爰新鹿苑
之規妙絕剞鐫宛備鷄山之概所爲穿山度石仿童子之南求

帶。水。拖。泥。效。常。啼。之。東。請。半。千。年。一。作。寧。愁。手。足。曹。騰。五。萬。拜。
不。辭。豈。惜。鬚。眉。墮。落。今。啓。貴。官。尊。士。結。人。天。一。會。之。因。賢。宿。仁。
人。脩。福。慧。雙。清。之。果。望。脩。羅。戰。勝。堂。成。殊。非。婆。達。施。眸。倘。昆。首。
稱。檀。像。就。誰。謂。豐。千。饒。舌。

答陳雲伯書

奉東海傳書於德公桑下。開械一讀。語語出於肺腑。來書第一事。謂與小雲書。不宜多諛辭。凡忘年之友。所期於少年者。竊謂如禰衡之才。豈及孔融。而諛之以顏淵復生。顏淵之克己復禮。豈肯赤身裸體。打鼓而罵曹者。因其好學。與顏淵類。故以顏淵許之。若黃憲學問大成。則直曰國有顏子矣。小雲洋洋纒纒。筆底之零金碎玉。一掃數斗。鐵雲在真州。謂良士曰。小雲比蘇過。好才高而氣下。及良士還吳。視其詩文。諦其氣息。聆其語言。性情從肝膽出心。以爲吾輩之替人也。喜之至。故許之過。良士浪游數十載。見前輩賢哲。皆以此法誘掖後進。故眉飛色舞。而欲於諸老後分一席也。今甫與締交。而瑕疵之。譬如吾輩盛開之花。而責初茁之牡丹曰。汝蓓蕾小。牡丹之才。必望我鐵梗盈抱。

之海棠而却蕙矣。小雲此時清才也。美才也。實奇才也。我輩目
 不遇清才美才。遇清才美才而亦奇之矣。况果奇耶。良士素畏
 奇才。兩字謂用之不善。不特嵇康鍾會孔融禍衡之倫可鑒。卽
 太白東坡亦以奇才受累。良士不敢自誤。以誤人也。蓋喉舌間
 有一斛言語。欲進吾小雲於百尺樓頭。又紅柏山莊有秘書數
 百種。欲效蔡邕於王粲故事。託付得人。庶心無罣碍耳。來書謂
 足下之詩。不如鐵雲樊村。且及良士。請以我四人之長短論之。
 鐵雲前八卷之詩。良士常向上一筆勾却。曰從此存集。則先生
 之詩無古無今。獨步宇宙。於尊兄碧成仙館詩曰。一篇不可刪。
 二說出一人之口。非佞也。蓋碧城十卷之題。皆人人所欲做之
 題。如吳梅村永和宮詞圓圓曲。但看題目。已是驚采絕豔。故可
 改。而不可刪。鐵雲八卷前出鬼方。則不若馬墨麟徐芝仙諸人

之奇險。出入京師而贈答諸人。皆人世所不聞名。故謂之曰刪。
樊村詩體。漢魏正始之音也。其作南北朝樂府。是蹈楊鐵崖之
前轍。與鐵雲之春秋樂府。皆楊子雲太玄經。寂寞中耗費精神。
非人人胷中欲做之題。恐作者極意矜重。閱者祇作十七史彈
詞看也。碧城詩。良士欲盡一年之力。首首和遍。恐蹈詭符之
誦。故不果作。蓋自有詩集。碧城一集。如秋。霄。月。華。玉。輪。五。色。如。
春。林。花。讌。繡。幔。十。重。又。如。天。女。炫。粧。仙。娥。顧。影。吐。咳。珠。玉。隨。閨。
風。飛。落。人。間。也。宜將刪去之。作首首改存。不可一首刪也。謂不
如鐵雲者。萬里路爾。不知萬里中人人欲做之題。不過百餘。如
蜀道中人人欲做之題。皆在鳳翔漢中。皆陝西也。入劔門。則武
侯廟綠珠井。明妃村而已。縱作一首登峨眉絕頂詩。無人能口
誦也。老杜在蜀。如秋興諸將。皆在成都而作。西京之詩。故人人

流涕而讀之。今樊村胸中深知其故。不能懸虛而作。故作樂府。此避易而趨難。樊村之慷慨悲歌。嘗稍稍讀其數十篇。而惜乎其未全讀也。想其盛氣流行。驚人心目之處。必不在南北史樂府也。質之樊村。亦必首肯。至若良士。則甚愛碧城一切之題。遠其狡獪伎倆。而改爲董賢廟碑。孫夫人廟碑。蕭皇后哀文。懿德皇后哀文。明與雲兄爭勝。而不和大集之題者。物可一不可兩也。去年見頤道堂詩選。益多憑弔古今表章忠烈之作。驚心動魄。自以爲不可及。故有必傳兩字之作。及觀崇明往來一冊。多至百餘首。則心竊不然。以爲鐵雲之詩多於前。而雲兄之詩多於後。將來之病。必無好題目。而隨遇皆題目矣。此不得不爲雲兄進一言也。鬱其才使不卽伸。忽然而作一首。得之天籟。或出鬼謀。則半首一篇。勝他人之十疊韻矣。譬如良士作始皇墓詩。

曰五百童男浮海去。八千子弟渡江來。揚州在汪劔潭先生席上。他人閱此二句曰。此秦始皇一聯輓對。人人胸中有此語。而未嘗湊成一對也。所謂鬼謀者是也。雲兄新集中篇篇有之。不謂過自謙抑。昔有謙之太過而不嫁其三女者。可以鑒矣。尊伯老成清簡。是徐稚子郭林宗一輩人。見屬壽序。當竭其心思。能事而構之。而略節不詳。古人作序作傳。皆舉其平生行事之零星碎小者。摹寫之。如謝安傳絕不序其奠安江左之功。而序其坐海船扇蒲扇著圍棋折屐齒而東山絲竹至今如聞其聲。卽馬遷作高祖本紀亦不過序其賴酒錢闖博場使兩女子洗足而英雄之氣奕奕在紙上也。昨有一書寄小雲。屬添寄數條。遲久未得復。故先擬一篇奉政。仍望將嬉戲釣游之事。或幕中所辦公案利弊平反新異可傳者。錄寄數則。俾得添入此序中。使

筆。今急就而序次之。恐遇轍之鮒。見笑於東海龍王。而以爲不足潤也。小雲代贖秋衣。而北風又來。索逋之客座。上常滿。較十年前。浮家泛宅。全家在皋亭梅樹下度歲。另是一種風味。日日效陶淵明作乞食詩。臨顏魯公作乞米帖。知必有賞其筆墨之佳者。雲兄其首屈一指也。崇明卸事。若得實缺。良士思以方外之身。作碧城書記。先爲大集作一箋。注次將萬春園院本。作成再將鐵雲之琵琶。賺人面桃花。及諸樂府。令兒子善才書一通。藏之碧城仙館。此又一大願也。蓋自國初至今百八十年。詩人輩出。至雲兄而集大成。鐵雲嘗與良士言。詩壇一席。各宜避君三舍。此後惟當以詞曲度日。鐵雲詩勝良士。尙作此言。况良士耶。况有追風逐日之小雲。伉儷耶。文章五色。鳳之雛。無非丹

山。舊。爲。良。士。之。合。十。讚。歎。未。有。已。也。尊。兄。勿。過。責。也。山。莊。柿。葉。初。紅。老。梅。艾。納。作。紅。碧。色。望。東。海。朝。霞。隔。大。海。水。思。君。不。見。我。勞。如。何。嘉。慶。丁。丑。秋。日。

此。余。丁。丑。年。在。崇。明。初。刻。頤。道。堂。詩。樊。村。勸。余。盡。刪。碧。城。仙。館。舊。作。仲。瞿。謂。舊。作。一。首。不。可。刪。因。作。此。書。相。寄。也。蓋。樊。村。學。人。之。詩。墨。守。婁。東。沈。敬。亭。許。九。日。之。派。沈。許。奉。歸。愚。爲。圭。臬。故。所。見。如。此。余。十。四。卷。前。從。樊。村。言。所。刪。較。多。已。梓。成。大。半。後。亦。覺。其。減。色。因。以。所。刪。另。編。外。集。至。今。頤。道。堂。全。集。微。特。不。愜。閱。者。意。亦。不。愜。己。意。手。定。之。集。尙。如。此。况。身。後。待。人。論。定。耶。因。思。古。人。全。集。完。善。者。少。職。是。之。故。試。取。漢。魏。六。朝。三。唐。兩。宋。及。元。明。各。家。全。集。觀。之。毫。無。遺。憾。者。幾。人。哉。余。詩。自。頤。道。堂。全。集。外。加。以。西。泠。五。集。華。胥。七。編。秣。陵。集。戒。後。詩。

存畫林新詠不下萬首潘榕皋先生謂余詩過多無人能閱全集者故擬分類分體另編碧城詩髓一編損之又損尙及二千首則多之爲患也此書久藏篋衍因錢君梅溪爲仲瞿哀刻文集因錄與之並識顛末以志良友相愛之意誤從樊村之言在當日亦未嘗無所見且非此則詩格不能變也故無悔焉道光戊戌六月雲伯書

煙霞萬古樓文集卷六

秀水王曇仲瞿氏

一名良士

祭光祿大夫素香公文

元戎麗極仙源輝玉牒之圖華嶽崩雲天漢泣銀潢之冑國以宗老爲尊天必假耆臣以壽蓋長 泰壹之神不死者國皇

之宿乃勿令綠圖益算於軒庭紫府乞齡於羲宙國喪雄陶人思風后豈佑其後者能昌介其躬者弗厚仙闔難排靈穹莫敬如吾素香光祿府君之棄吾制府長公季昆而逝也一則班超萬里軍中讀馬服之書一則黃霸三年江表手鳳陽之訃毀容侍嬰舍賙匪親纒髮承衾桐棺莫附蓋河湟遠而岷岷悲淮泗歸而藜藿賦竟使孝王伯仲慟闕禮於飾終百藥壙篋爲奔喪而徒步用是青芻縮酸寮侶推膺白馬流蘇寅官孺慕者也公

傳資鹽梅臯颺肱股懷平當之經濟學出天人資郤穀以詩書
才兼文武世紀伐於功宗身起家於民部薛生兩鳳翊家國之
羽儀荀毓雙龍惠熙朝之霖雨是非后軒夢駑驅羊出牧伯之
才抑猶趙夙生衰愛日煦江南之樹繁公啓宇手種三槐郎伯
巡方天承八柱越稽我長君制府長公之撫我江南也碧幢紅
旆初開幕府於臨安鐵鉞瑠戈遂築節樓於吳會人歌杜母羨
歛胥蠲民頌倪寬羸逋不督察蟲盤覆地之冤洗蟻穴黃沙之
獄秉墨吏于蠡炎屏譚官以鷹逐陶侃之恭勤軍府檢束豪民
劉宏之都督荊州威行南服於時中官錦彩善政時旌 天
子璽書慰勞最篤而又黃龍望府次君有飲水之清紫馬來南
太守有貨船之譽初官司馬江東兩杜之名繼駕朱幡鳳水三
刀之署使郵亭皆畜鷄 幹吏俱爛文句此非殷家世學盡

受訓於劉翁公綽門風定躬陶于孔鑄者耶 皇上以元齡

屏誠贈公光祿之勲韋賢籛金晉賤元成之爵方喜福時令子
永承鯉訓中庭堯叟賢昆長侍阿翁東閣而公則福天遊幻纔
蒔少海之桑壽宇迟迟竟騁遼東之鶴神鴻歸去天上行春赤
鯉飛來人間無葯嗚呼痛哉 和衷江戒有元方父事之尊

參佐淮南受萬石官聯之教認揚公石馬當年隴草增悲望彥
先琴牀今日徽絃永悼蕪辭遠酌思題都尉之碑絮酒空醴敬
奠平原之廟靈駕風來神顏電笑尙饗

督撫公祭督部大學士公孫文靖文

嗚呼靈穹勿圯倚斗弼之有九星巨鼈不傾藉坤輿之有八柱以故樞陳元律七聖佑天世馭蒼牙五期佐命設若斷盤皇之手臂必無兩嶽同崩卽或壞帝座之藩門豈有三台並暗况壽中黃以翊寶鼎元輔長生老彭祖以相放勲大臣弗死豈有星逢復旦再奪三公日際重輪三堯上將謂中朝多翼弼則未必玉帝少股肱且天上有文昌又何必向人間借將相也越我督部大學士公孫公以七月某日薨於來鳳時也苗民犬孽軍已焚其牙旗米賊妖人部又穢其紙傘天子坐金牀以望太歲夜有捷書三軍祭白石而名彭巫鬼猶畏藥乃繼福郡王祁山之訃一國皆驚距和伯督沔水之喪前軍先哭天喪元臣何其革也或謂公宵趨上邽倍道兼程夕救樊城事繁食少而又

南封銅鼓飲伏波之毒流西祭金人食疏勒之井水以致偏枯
病禹大荒之神木無靈甘草醫龍伊尹之煎方不救七萃譎虞
五軍郊弔繫可痛也蓋公忠以相國義以督師前此黎侯失德
阮疆徂侵雕庫告國難於前申胥乞濟師於後說公者謂君如
好鶴臣敢盜弓訟是元咍國猶肥鼓公以仲尼沐浴荀息鼓鐘
自當收充國金城徙夷人銅柱將見一征自葛三戶亡秦國斥
突辛屯開戊巳直可使百蠻土牒全歸 天府輿圖六詔交閭
盡拜將軍畫像此五單于分國之日天厭南荒亦兩克汗並立
之時利居中國而公則木罌綬渡繩棧徐趨圍項三重退原一
舍明許其壺漿箪食以迎默聽其棄甲曳兵而走蓋以爲殺相
柳而三仞三沮無若服孟獲以七禽七縱故其師陳富良江也
爲之子竊燕而伐則匡章可以無功爲季孫逐君而來則乾侯

可以勿戰。此由念彼苞桑，傷其破竹者也。泊乎羿弓射日，共頭觸天。太公以蒼兕覆船，長鬣以餘皇誤敵。公猶斧開馬足，軍出龍頭。以桓侯據橋之聲，止晉帥爭舟之血。宵且濟也，整以暇矣。如謂軍籓，衷甲荆舒，肆欺梨樹，奸盟吐蕃，賣詐公豈不知危攻。東馬險出，飛狐斷長蛇兩頭，塞狡兔三窟，祇以爲聖人不

殺之心。王者無外之意，但宜魚水。其君臣不可鯨鯢其土地，是爪士全師以伏，張虜公分。誇於破斧者，堂堂乎仁且義也。於時降城旣築，老鳳初飛。以桓公北伐之軍，充寇恂還朝之騎。以馬援南征之檄，應溫嶠內召之書。國以李牧爲長城，帝用張蒼爲計相。方知唐廷燕許，便是將星。舜殿夔龍，亦勝弓甲。公復曳姬公赤舄，活安石蒼生。務使呼韓頓顙，知貳師爲近臣。回紇來朝，識汾陽爲內相。所以樞庭樂奏，無非夔吼。鵬爭秘省文章。

亦是三官五意蓋行父之頭未禿而荆公之鬚已蝨也未幾中
書出鎮節度巡方領陶侃之八州奏姚崇之十事尉陀國裏旌
節花開日月官邊阿衡船到人以爲田千秋之相度李光弼之
軍聲歟至若官轉六曹身遊九寺出托克爲行省中書屈太白
以翰林供奉 君恩則前後公銜故事則子孫男爵此史氏
叙官詞林佳話公之相業不繫此也至於躬毆狡獬手掃撓槍
皇上以廓爾喀不靖 命福郡王移師西藏也時則婆羅門

族黃教三千帝釋國中魔兵十萬 帝謂梵天兜率豈容調

達刀聲佛土耆闍不許天神劍響而不謂鐵圍三戰鬼母皆飛

法螺一吹金剛盡甲王乃咒韋陀之杵折波旬之戈公又屏履

羸糧馬牛運木護火具以狼機通雪山以狗站驛名籌韋馬借

駸經聚米如山飛芻入國公之輸輓抑又勞也旣而韋卑鎮蜀

人言諸葛後身嚴武守川地是公孫舊國而其日黃巾白狄苗
龍之支黨潛來赤髀橫囊檠瓠之子孫又反我以爲令如蠶尾
楚人是何多也彼以爲地是犬牙漢兵其如子何公乃掀翻大
海沃潑流螢全抽董澤之蒲慟殺萑苻之盜而無若荆巫狗噬
楚鬼狐鳴持白挺而作妖民探黑龙而殺武吏方將分元女兵
符收蚩尤魔陣乃赤眉之族未殲而白雞之年已讖矣嗚呼痛
哉河湟未靜休璟先亡安西未寧代公又沒公不念大庭滅
膳南內撤懸與其風山紫府天上神仙孰若力牧山稽太平
宰相某等官聯江左手版淮南翼尙父以玉璜祭巫咸以金鼎
欲書亥字碑已藏峴首之陽要望午橋神亦葬畢原之上用申
盜酒祗酌緹觥爲將軍作諭蜀之檄靈馬風來與丞相作詛楚
之文雲車電下

爲河督徐心如宮保祭沈慕堂治中文

嗚呼。裹雞。漬絮。奠南州之酒者。千里之交也。白馬牽旒。迎庾公之喪者。黃河之阻也。而况兒寬爲經術出身之吏。羊綏是國家可惜之人乎。嘉慶十年四月。天子嘉趙廣漢之聰明。使以

南路廳分知畿輔。以張京兆之儒雅。又以治中官擢佐黃圖方將收豺狼避道之最。枹鼓希鳴之薦。賜黃霸以丈車。拜韓稜以楚劔。而乃輦轂三年膏肓。一臥褒馮。勤爲佳吏。未下璽書。望蔡茂爲中台。空成禾夢。受俸纔畱一月。攀車已哭。五倫如我。慕堂京兆治中之卒於官也。公察舉本郡孝廉充武英殿繪圖官。六年凡一切玉衡金度國章泰壹圖書之秘。風鼓孤虛鐘律刑德奇胲之式。蚩尤封胡鳩治地典容區之圖。星經日晷宮室職方。形勝之器。靡不手規黍尺。目睇蠅蠹。輸盤不能名其工。略璞

不能究其博以乾隆五十一年

欽定四庫書議叙之日

命以左右輔令長官署用公遐慕潁川四長之名中牟三異之績手樊遜清德頌讀傳氏治縣譜歷雞澤唐山肥鄉安平蠡令於時韓延壽鐘鼓管絃之治思信遍廿四縣袁邵公噫嗚流涕之聲獄罪出四百家矣而贈公捐館賢宰宅憂陶士行居廬弔鶴阮嗣宗泣血蒸豚無以喻其毀也憂滿又歷宰饒陽藁城為大名長垣令懲西門豹請璽納璽之拙任巫馬期星出星入之勞二年之中薛宣幾欲換縣馮魴呼為健令嘉慶元年總督梁公上最狀以公為卓公寬中劉陶錯節也今上褒公治行畿南百縣張既為三輔第一日下諸城呂又以一州居首以三年某月應三刀之夢遇采薪之憂病痊赴部聖上以關中地重非良吏不能成况虎威直督以畿甸才難非賢者不能

保。蘭。絲。障。大。府。表。刺。涿。州。所。謂。八。鎮。開。關。九。州。大。湊。也。改。保。定。
安。州。長。選。深。州。直。隸。州。事。漢。法。以。六。條。察。于。石。州。牧。為。尊。陸。彰。
以。一。歲。歷。三。州。車。朱。最。曜。公。風。屬。吏。行。春。警。村。民。置。鼓。郭。飯。去。
帝。城。不。遠。蒙。福。京。師。張。亮。作。山。頭。好。夢。絲。掛。幽。州。趙。郡。之。鹿。不。
偷。緩。山。之。桃。常。熟。或。持。鎌。刈。草。而。宿。郵。亭。或。課。果。樹。榆。而。訓。村。
落。來。則。耒。犁。用。水。去。則。胡。牀。掛。柱。公。之。愛。召。翁。卿。似。之。公。之。察。
冀。渤。海。遜。之。也。京。兆。王。畿。千。里。以。同。知。分。四。路。猶。郡。國。專。十。
道。南。路。城。接。天。垣。地。連。瀛。鄭。賣。刀。劍。賣。牛。犢。者。為。良。民。棄。鉏。鉤。
持。兵。弩。者。為。奸。宄。是。以。南。塘。舫。下。逐。捕。為。難。冀。州。部。中。豪。強。善。
梗。公。肅。清。驛。路。游。擢。治。中。方。高。柔。擁。膝。之。時。正。汲。黯。病。多。之。
日。德。林。之。級。未。徙。張。威。之。笏。已。還。以。十。五。年。四。月。卒。於。雄。縣。鳴。
呼。鄭。子。產。國。人。含。訣。盲。史。傷。心。公。孫。宏。經。儒。治。才。漢。書。循。吏。公。

四子孟季以孝廉明經授令長校官叔仲以河隄水工爲郡丞
縣宰胡威父子皆是清官石奮一家居然萬石豈非隱侯門閥
雲卿文章代有傳人替手乎公治類桐鄉慶流石相吳公爲治
平第一所去民思田叔爲天下長者乃令君死某婁湖列宅與
沈慶之閉里通親韋放徐州與張吳郡昏姻篤舊方期吳興印
渚他年歸話司州東陽長山今日已無支遁孫興公猷川築室
空賦遂初願長康一鼻長風無從寄淚敬遣某官順過任城代
躬醞奠一盃椒醕臨風望顧榮琴牀幾瓣心香何處哭王濛塵
尾尚饗

為河督徐心如宮保祭戴恭人文

夫有博平新野之德者宜饗以鄉君萬歲之封有宣文修成之賢者宜報以趙母赤烏之壽此史氏艷稱乎萬石君之教家曹大姑之能誠子婦也重九後之數日恭人之訃書倅來淮浦時也季君五年以邱媵功喪方館甥貳室夢中指痛許止之藥未嘗遊子衣單許郎之裾欲絕括髮奔喪禮也恭人為今治中刑部員外郎前滇黔兩省州刺史芋園先生德配故廣州司馬石蘭公家媳訓導戴雪溪公長女也受經伏勝侍數公之中庸治禮曲臺傳韋姑之論語續史則巾幗選談弄筆而女中燕許凡一切龍輔女紅之書劉休鼎味之錄陳媛獻椒辛姬頌鞠罔不佩容臭於雞鳴承揮施於夜燭結褵之始外則王舅在堂內則若姑在室與門五世男角女鸞食指千名奴耕婢織李平陽高

明賢女每事皆恪鍾夫人惟裏簡婚無姻不擇憲部公以名進士歷官內外也雲司書日之筆治中京兆之倉三刀雲北一州水西凡韓母中興之賦皆蕭恭德政之碑也丈夫之子六人季女之尸三索漢武帝元光初詔三兄各舉孝廉唐高祖武德開科一弟先成進士竇家五桂添郟詵之一枝荀氏八龍少朗陵之二子嗣君等或乖淫治蜀一縣神明或震澤分符三吳大治九天咳玉榮擢步於堦筮一帖泥金耀官袍於娣姒而恭人方三錫三加一驚一喜也喜則花磚弄影小郎之乞假將歸懼則竈突吹風豕婦之災占不已蓋洞庭之書方至而恭人之疴已不起矣當時也巫山滄海元微哭婦之詩蠶薄機絲王肅傷妻之淚王夫人邨門宅相九十何衰魯姆師宗國女儀百齡以外憲部公將衰潘鬢忽傷王維寡居乍鼓莊盆不作樊英再拜天

何奪我恭人以古稀之歲耶恭人期孫六人女如之會孫二人女亦如之長君官銜在祿秩之令姓名登茂陵之書幼者或絳帷受易吞卦聰明或擁樹弄書之無識字李夫人之八篇典式不傳女而傳男華孟姬之輜駟安車比抱孫於抱子豈第京陵當日人仰慈雲東海當年獨留孝水也已哉某學愛子將才憐士行有左思嬌女之情少張禹愛男之性季君之讀書賓幕也安陵樓上丈母見憐金谷園中姊妹最勝袁豹怪其書多樂廣知其玉潤方以爲選婿窗開泰山峰近豈意蒙喪錦被元方計聞泣血蒸豚嗣宗歸省翳可痛也夫甘泉畫像朝廷翟茀之光也子舍白頭士大夫私家之事也某家寄淮南地睽吳會六龍同食喜荀陳兩姓之方昌五鳳齊飛慨軼轍二人之未第方擬恭人以師氏媿媿之年王母皤皤之几何圖九龍母死五時

衣空萬歲山高。一星婺墜。傾箱倒屣。待謝家親戚之濃。篋官包
苴。信許允山中之淚。遙申椒酒。代榛栗於威姑。敬獻蕪辭。補闕
文於君氏。徐惠辭章。唐六典誰修女憲之官。書班昭文字。漢春
秋宜入夫人之石誌。嗚呼尚饗。

爲戶部侍郎總管內務府大臣桂香東芳及己未同年官

九十六人公祭史太恭人文

嗚呼讀瀧岡之表。慟母儀者。一代文章。讀碧落之碑。哀母教者。一門四子。匪桓少君。鹿車甕汲。焉能相鮑。宜爲名臣。匪義成君。紫綬文軒。焉得訓崔駟。若師氏我年。母太恭人之叔季嗣。君某等。己未同年進士也。其初燕山五寶。舉孝廉者。一叔而四昆。其後鴈墻十年成進士者。同科而兩甲。雖堂開四桂。護庭悲一鶴之飛。而家本五良。令母喜三龍之躍。先年以宜人章服晉封大恭人也。五花金字。卽長君鳳閣文章。百縑告身。卽季子螭坳手筆。甫也。工部爲太夫人吟慈竹之詩。遜也。揚州有何水部看梅花之閣。我諸同年以歲時上壽也。擬以八十上郡君之板。九十介蘭英之酒。登堂呼魯肅。以兄上殿掖馮勤之母。乃石建之

四子白頭同居。子舍而王濟之三刀夢益一麾出守也。季君守蜀郡之明年陶母居京潘輿弗駕官中書者以蘭臺秘省爲家居官工曹者以補闕拾遺爲林下舍人俸薄借潤筆以甘旨水衡錢多比參苓於米價太恭人方嬉花園以宜春抱佛經而坐夏豈意三周小滿還朝之五馬未歸五月中天無恙之慈雲忽化耶太恭人執婦道六十年風庭抱樹代夫子而臥冰麻粥兩孟乳小郎而夢抱蓋別駕不爽爲王祥之孝撫叔不失爲昌黎之嫂也初年丈蓀裳公通守南康三年熱釜寧留孟光春聲一輛柴車不入王良官舍太恭人之意以爲冷官滋味不妨借鼎嗜龜海樣玉城不若隱人高價嘉慶元年公膺

兩宮引

年之典受于謹延年之杖時也房中之樂盡是壽人夢裏之鈴無非才子七孫八婿韋姑周禮之書百拜三加子姓冠婚之禮

其閭門福德孰有甚於此者嗚呼人子爲二千石之官一時未必三品受女賢人之號百歲何難太恭人豈不見夷鼓方雷一門氏族封胡羯末羣從芝蘭讀廿四首達生丈人之集齊肩畢竟手四十章西歸遺教之經人淚闌干文曰

燈纂能榮鬢華不萎仁人事母百年乃慰若佛涅槃若仙脫蟬

慈母安矣孝子憾焉月惟重午其日則晦熒惑在心是時熒惑守心者一月

日中方慧三沐三薰瀦潘請贖反席未安若坐假寐恭人先期

召名畫師曰予事佛寫三歸依曰予受經具四威儀童顏鶴髮

鬢成而嬉飾終之物恭人手儲瘞錢十萬鑿楹而書漆棺壽藏

舍殮所需明衣明器治於閒居不欠一錢麻姑升仙不磨一針

大士生天南康之喪居以九年琴書一廢行像長懸俞氏史氏

初爲朱陳漢法交互相爲昏姻內兄外弟出入庚庚謂甥謂舅

我舅我甥以是兩姓弟兄發發季狸季豹伯達伯适入廚八及
四黃四括進士者四孝廉者八

兩氏各以姑表為督各生四子
鄉舉者八人成進士者各一人

同科同甲

金昆玉友一樹之凋三珠之秀荀令中書何郎水部兩車入朝
五馬出守昔事南康不入官舍臥冰哭竹王祥別駕乳姑者有
乳叔者寡恭人之孝名聞天下上自廟祭下迄童婢三鼎五鼎
手自滌器鼠耗米耗三千不計恭人之仁如雨雨地延壽有杯
長生有枕飛龜不藥畫龍無病手遺教經人華嚴定鴻範五福
繫母則聖亥字疑年七十而五凡我同年登堂拜母絳帷聽經
一朝弗覩讀大家箴悲中興賦恭人之堂名曰四桂恭人之封
鄉曰萬歲張說父碑鍾會母誄一門之中文章諸貴絳州刻石
甘泉畫像列以班昭傳之劉向靈草一株胡香四兩絮酒椒馨

哀哉尚饗

查梅舫大廷尉八十壽序

某聞威械弛而俎豆布鉉鑽絕而九刑厝若廬都內之獄不興。而后廷尉得以斷天下之平。孔稚圭曰：從古名流皆有法學故釋之定國。耆頤漢朝元常文惠久壽魏闕也。嘉慶十八年四月朔日梅舫大廷尉八十攬揆九卿六曹大夫爲公奏壽人之樂。翁覃溪學士以下祝嘏而介詩者如千人而屬序於良士曰：昔荀爽百日而司空賈誼一歲而大中僕年八十始爲廷尉子毋祝我以殷阿衡周鬻熊張蒼夏侯勝胡廣公孫宏亦毋祝我以胤公戊子之大小晉公甲辰之雌雄使僕如羅結之百二十而長秋王祥之九十四而三公一門襁褓百笏儀同堯年蝙蝠果老侍中勿虛爲我譽也。予之康強而耆艾者予知之矣。于滇州再刺蜀縣再尹守粵西者兩郡臬黔賴者兩省常鎮觀察楚南

轉運中歷金川兵事安南軍政僕稍有武功不足稱也然予之
康強而耆艾者予知之乎予始宰縣也蜀之宕渠今爲南江橋
名黃金地曰柏陽灌木百十里古柏萬萬章盤古不名其枝柯
之壽豎亥不測其道里之長孔明不踞爲廟漢武不取爲梁幼
者柏精老者柏皇在混沌不鑿之天地有萬古不覩之太陽時
無莠民乃有奸商開山匪大馬壅草匪商鞅將庇焉而縱尋斧
亦狡然而思敢驅山虞貨金錢匠木刊州章予投牒而籲大府
曰人三爲衆獸三爲羣十年樹木百年樹人五丁欺蜀牛之糞
大鐘給公由之君商與民爭利夷與民爭地人非奢香驛非龍
場徙令者商君之木構兵者處女之桑黃龍清酒罰必雙深山
大澤禍所藏利市百倍必生否臧斧斤一入必有死傷惡木不
廕嘉樹無忘曷若斷鐵山之直道樹禁碑於柵陽寧絕地利毋

破天荒。至今五十年無干我刑也。子知之乎。枯松有太保之名。大樹爲將軍之徵。老七松爲處士壽。五柳爲先生樹。有音聲木有神靈。某喟然曰。此公之所爲康強而耆艾也。某又聞之矣。槃疏地力。揉耒剡耜。神農氏之治也。鑄刃范金。避臭去毒。燧人氏之始也。昔鄭國溉澤鹵而秦成奧區。李冰開稻田而蜀稱陸海。公不嘗開巴山之老林乎。檄楚民二千戶墾萊田三萬頃。使九真知火種者任延。俾廬江知牛耕者王景。棗祗之屯田。許下張飛不用於閬中。鄧艾之手執耒鋤葛亮未行於南鄭。蓋后稷以稊種而神伊尹以區田而聖。某聞巴州通江之間。大寧竹山之內。終南漢陰之際。各有老林。皆千餘里焉。使大吏行公之法。以清秦楚蜀之山溝。則材木枿蔽於漢江。以驅秦楚蜀之耕牛。則粟米積高於庾廩。統萬古之龍荒。合三省爲一井。苗民何所斂。

其穴山賊何所竄其脛公之德倍彭幾而八百之未有艾也公
觀察淮南某從公遊時蜀賊縱橫西鄉鄰水間公方吟焦山之
鼎味橋亭之硯譔潤州之誌收漢人之篆率更千字之碑寶晉
百家之翰江惟草木張萬福之威名甲士金山陳少游之水戰
客方借箸而談公不拊髀而歎某以爲八公文字乃在淮南四
皓功名不如絳灌宋制大理官不置吏士大夫手掌文書防吏
奸也公筆惟畫日三尺之法不搖案卽如山一牘之手弗假不
使召公勞而爲方伯者 朝廷所以禮耆賢也必使畢陶喑而
爲大理者 朝廷所以慎肆赦也張湯持法精天子用何比干
而平周興治獄峻天子用徐有功而慎此今日大理所由覈尚
書之成要乎某聞之伯機有支離之叟法潛有蒼髯之友宏景
以種松而仙張騫以石榴而壽東平之柏西靡摩頂之松東首

白公有檜。歐公有柳。成都之桑不多。龍陽之柑最久。外黃柏樹之數。虞延知之。大別千年之柏。神禹植之。某今而知楷模。所以百世周孔所以長生也。夫福一日之名位者。不若爭百世之利。立一時之事功者。不若壽一方之命。是以草宅病於周書。均田美於夏正。桓寬所謂寶路開子思所謂寶藏。與古云埋金九里。不若開得意之田。置身九卿。不若官一縣之令。蕭何作相。以請佃上林爲奇功。貢禹彈冠以請佃宜春爲善政。若汜勝有九穀之書。而不墾一弓之地。賈總有齊民之術。而不開一廩之畝。此治民之月令。非縣官之治譜也。山海經云西南黑水之間。廣都之野。爰有膏穀。冬夏播琴爲公。千萬年南江德政碑可也。中丞銅鼓堂詩。遍天下矣。公換羽移宮。拋鍼擲線。叔源之步不隨。明遠之色一變。詩如千卷。落花依草。邱中書之風流舞雪。迴風范。

衛軍之婉轉廉頗今日方上馬而如飛馬援他年且據鞍而顧盼

歲癸酉春暮花農通守自南海旋京云廷尉生辰京師鉅公
爲詩乞君爲序余曰某爲文喜紀實事平生無釀詞遲日走
見廷尉曰我平生政事無當意者少年宰南江柏陽之柏廣
袤百十餘里禁商民之奸顧監司立鐵案封其山至今遵之
活大柏億萬萬焉時蜀未被兵恐伏莽有先見也又嘗開巴
山之老林深巖密箐萬古不耕予召湖楚民一千三百戶伐
叢灌芟荆棘墾沃田二萬三千餘頃刀耕火種數十年熟矣
因書南江紀事詩暨黃金橋古柏行曰此題目也爲予序之
某曰此功高大禹德茂后稷矣某聞川楚之間曰城口團城
有未開老林千餘里焉終南之南漢陰之北并柴關鳳嶺而

東老林亦千餘里焉合大小巴山之老林千數百里凡三省
四千餘里皆禹貢梁州之域也華陽黑水爲梁州黑水在今
畱壩廳之內想大禹刊木益焚山澤時皆在此處此四千里
之梁州更世亂而再成洪荒者也廷尉創開老林始此一縣
所謂非常之原黎民所懼人情昧安難於慮始此事功之足
傳千古者故序之以請於後此之節鉞三省者踵公法而行
之庶幾乎弭百世山民之亂而衣食此四千里之人民也并
記於此文之後

屠孟昭大尹尊甫蘭渚封君七十封安人宏農君五十八

歲壽序

漢崇上巳晉紀重陽春秋命歷之序魯侯燕喜之章古今士之
傳世而不朽者曰儒林文林曰賢良循良疑年在亥四月維夏
廿有三日爲封君屠蘭渚先生七十攬揆封安人宏農君設脫
舉觴則孟昭太史宰古真州之第六年也初先生年六十浙中
士大夫爲孟昭介舉於通德之里第鴻章鉅製班書范史而先
生之德始彰先生直亮方正朱絲繩也溫良精潤玉界尺也儉
年程穠寒年纒纒豐年玉也讀萬卷書行萬里路天下才也梓
其壽之文十餘篇景鸞經涉七州李固周觀天下序者謂先生
豪販吳漢於漁陽贅百里於秦市逢萌擲盾而不役傅介棄觚
而不事序者謂先生介一旦歸歟手計然之書取白圭之棄序

者謂先生善處貧。樓護過齊而合宗族。折像厚藏而施親疎。序者謂先生善處富。顧凱手植嘉樹而憲之果。爲吏部王祐身種庭槐而旦也。眞爲三公序者。謂先生迺遭而後通。艱難而後順。爲先生食其福也。若者序先生之遇之奇而不序先生之志其遠而志其大也。功莫難於傳世人。莫難於知子陳羣。生實而知其爲興宗之人。索靖生緄而知其爲宗廟之器。夷簡宰相才祖禹。天下士皆門以內知之。不先之以丁覽者。必不成子賤之堂構。不後之以韋陟者。必不傳安石之盛名。袁象才識父。觀知之。謝朓千金父。莊識之。蓋先生知孟昭之學。不惟翰林孟昭之才。不止令長故使之盡讀天下書。遍交天下士。若崔液以神駒譽兒沈約以青箱名。子先生不屑屑也。舉孝廉而不使之急公車也。庭訓而讀等身之書。第進士而不使之僅工詞館也。庭訓而

讀經濟之書。宰雒州尹赤縣而不使之僅通一邑之治譜也。庭訓而讀天下利弊之書。以故孟昭之學精於馬鄭。孟昭之才通於班揚孟昭之文與詩也。富於韓杜。孟昭之以德與威惠治其邑也。趙廣漢之聰明。張京兆之儒雅。皆有之矣。孟昭讀書於清平山之日。良士弄田於花馬塍之時。當是時。鄭楊董展。顧陸張吳。讀其書五經三史也。韋王盧駱蘇黃米蔡。讀其詩。評其書。三唐四宋也。踰年而孟昭入詞館。宰儀徵。良士縱遊秦晉。至京而士夫藉藉述孟昭之治儀徵者。縛汚楮而禽糞裾。斬持練而辨。以孝紹賜之書。傳邑無苦水地。成好溪。及良士遊其境。文章訓士經術飭治。劉寬之處士。諸生文翁之學官。祭酒莫不敬以神君呼之。慈母先日登宓賤之堂。入崔儻之室。知先生韋氏宗會之法。延之庭誥之文。張融門律穆崇家箴。樊重之子孫。

若公家華歆之閨門如朝典胥在是也。而後知先生數十年之志不憚孟昭之不爲儒林不爲文苑而欲孟昭之必爲賢良必爲循吏也。蓋古有父隱而名盛子仕而名不噪者。龐德公不仕而山民爲黃門管幼安不仕而子藐爲郎中宗少文不仕而子賓爲南郡韋道遙不仕而世康爲荆督先生之所厯厯也。必也王祚家居而溥也。趨侍陳省華家居而堯佐也。側立則父子隱顯之盛名先生當之矣。先生以一縣者百城之表十道之率陶侃之八州荆州之十郡同是治也。乘一丈車賜三神劍隱者爲四皓之功名顯者爲三楊之事業鐘鼎在家竹帛在史政事文章先生之遠大我孟昭者如此宏農君年次於先生十二歲昔者馮勤之母八十而與朝會張齊賢之母八十而受手詔顯雍迎母朝臣畢臻合肥迎母將吏羅拜使孟昭他日導母輿而大

常奏四部之樂。執母轡而淄州迎數十里之郊。則先生期頤。掀髯所謂公著爲名相。而子揚其父美敬。夫爲大儒而子彰其父功者。先生之迪。遭艱難與福位名壽兩無憾歟。良士聞之。劉柳無稱於事業。姚宋不見於文章。今孟昭詩文集盛行大江南北。此韋蘇州之焚香賦詩。而民不忍欺。白香山之家絃戶誦。而吏牘一清。視當日局促翰院焚宮香而讀麗正文章。登落雁而攜驚人詩句者。庶幾乎西南夷之弓衣。皆梅都官詩吐谷渾之牀頭。亦溫子昇集歟。畫鶴之記。遍於新羅。子雲之書。傳於百濟。吾願立甲。宏揚先生之遠大。不急以藝事爲三絕。而卽以勲名爲四夔也。孟昭性純孝。故江以南能文者。必以一文爲先生壽。同載青山。羞掩父德。移書太常。求顯父名。古之志也。今孟昭求增父秩。古之孫遜也。乞擬母封。古之趙槩也。若良士之不文。亦思

序先生梗概曰此非歐陽氏畫錦之記實趙清獻瑞安戲綵之堂也

重修靈鷲寺啟

人天何幸中華留靈鷲之山烟水無人彌勒坐毘盧之閣

寺左先有毘盧

一開羅占廟云

將興大法以人傑者地靈要作道場必財多者工聚與迦

葉建五層之屋大石山穿爲長者造祇樹之林人牛金盡至若
盲人五百託榛樹而求家窮子三千投化城而覓宿是非九百
柱化天之殿道衆難居無一千年住法之人佛燈易滅矣蘇州
序江門隅靈鷲寺者蕭梁棟宇天監剎竿地非花氏之城名載
摩陀之國化龍影散佛樹枝枯以吳官花草之墟留沙劫沈灰
之屋久已鹿皮爛盡髮地無泥雞足山封龕門不禮者已嘉慶
三年有住僧僧綱某某者大牀口坐窟室淫居陽脩梵綱之經

陰構摩登之室。私呼梵嫂。明犯燈光。亦師羅什。大吞御婦之針。敢學文殊。竟擁同牀之女。半千年佛姨。壞法大可傷心。五百衆甄女。失通居然。未劫以致雷音。天鼓神走伽藍。接手抱腰。冤呼尸官滯其故宮。亘因呵爲鬼住。幸而法無淨穢。地有衰興。不倒魔天之殿。難開戰勝之堂。勿夷惡鳥之林。難種鳩羅之樹。茲有漏盡禪那天台。大德某者。內脩白業。外覽玄文。讀豐千樓上之經。望天姥峯頭之月。草屨踏遍。依普賢行願而來。拄杖擔存託居士草庵而住。以乾隆年月。寓於蘇州也。鐵圍海裏小結。維摩手版之居。蟻子宮中大書彌勒遮那之字。彭居士爲覺寺左小庵署曰昆盧而且開道場以甘露表淨刹。以金剛止觀。雙脩六時禪定。機緣四衆。五體和南。加以須達長貧。散陀不富。廉雷賈客之金。儉餉貧婆之米。示病不肥。隘麻長瘦。如斯人者。或亦梵門之龍象。釋氏之

笙簧者歟。蘇州百族蠶居。五民魚聚。笙歌七里。色官欲界之天。士女千年。極樂彌陀之國。亦有鞞蓋。大富象馬。施金亦有糞窟。奇貧嬰餓。供米或洗僧浴。佛溫室求男。或敬壇懸鈴。金錢祝子。且或香燒象藏。花獻波羅。媚佛燃燈。懸幡續命。如是小緣。咸希

微福。至於蓮宮。既廢。大利乃荒。鹿苑盪爲屠場。

蘇州北寺今爲殺人場。如宋沒後八十年。祇園亦改爲。

雞園。改爲茶市。

西園蘇之最大利也。今爲茶場。穢雜之地。

亦改爲。

殺人場。

西園蘇之最大利也。今爲茶場。穢雜之地。

地。雄九縣。竟乏叢林。寺曰四

禪。

吳中叢林最古者。南禪北禪。東西禪也。今盡廢。

不開鐘版。以致行腳。打包之衆。過午無餐。螺

蝸。蚌蛤之僧。沿街索睡。豈徒分衣迦葉。借宿桑中。托鉢阿難。誤

矣。且俗不施檀地。無分衛良。可歎也。近惟長元吳三方僧衆

門。稱應付未習。四檀八教之儀。官有僧綱。不明十誦。五分之律。

或家居火宅。神通則唾婦藏壺。或身處魔官。法力則燒豬喫酒。

其或播鈴鼓。飯日諷彌陀般若之經。讚頌揚聲。夜譚餓口。瑜伽

之印甚。至。驢。唇。鎖。鐵。狗。脚。關。釘。身。燒。釋。迦。之。鐙。香。蕪。藥。王。之。臂。
而且。獼。猴。作。帝。亦。坐。師。牀。狐。狸。偷。涎。竟。操。塵。尾。自。號。大。僧。難。爲。
長。老。此。輩。魔。民。勿。化。必。有。因。緣。鬼。趣。難。降。須。求。賢。聖。所。以。虎。山。
云。云。公。到。而。低。頭。天。台。山。神。智。者。來。而。匿。迹。聖。教。如。燈。邪。宗。
似。海。無。關。末。法。是。仗。導。師。此。易。俗。移。風。宰。官。居。士。之。所。望。於。禪。
德。者。也。某。官。等。以。十。一。月。十。有。三。日。送。師。主。席。山。門。離。垢。棟。宇。
發。光。榮。特。埽。塵。金。剛。淨。糞。目。覩。蜂。房。九。曲。尙。是。污。官。蟻。戶。百。門。
都。非。淨。士。緣。是。摧。枯。拉。朽。芟。其。穰。藁。正。位。辨。方。夷。其。堂。坵。以。爲。
宏。茲。蘭。若。必。建。廣。堂。大。此。招。提。必。興。傑。閣。夫。禪。堂。嚴。密。乃。結。冬。
選。佛。之。場。講。堂。寬。閒。乃。解。夏。談。經。之。地。瞿。利。帝。三。千。食。指。則。齋。
堂。必。有。法。同。應。供。之。厨。善。知。識。五。十。來。參。則。客。堂。必。須。八。萬。四。
千。之。座。乃。若。圓。通。示。應。開。闔。思。一。法。之。門。則。大。悲。閣。在。所。建。也。

唐梵同函貯滿半三乘之典則藏經閣在所興也如是棟梁皆資土木夫化人宮宇匪偃師幻術可成天釋殿堂豈毘首妄心能造須彌山青駕一墅亦用人功阿育王梵宇千間全憑國富則可知羯磨大斧勢不斲龍宮霜霰爲樓舍利長繩必不界蜃氣青紅爲屋某等因緣作雨解脫爲風誦福田一卷之經結香火萬年之社仗此身心布施同撐般若之船從茲利益人天共種菩提之樹讀洛陽伽藍之記草蔓煙荒撰北天精舍之圖高竿大利用布長牋敢申小啟署多寶如來之號大士和南書好

卷之三 之名辭王合尊

爲師禹門刺史送琴師張變堂道士入東磊山序

入懸雷之山者聽靈鳥以爲筋節說南斗之經者坐玉牀而踞

洞穴自輔漢著書而後鶴鳴山深想道陵冲舉以來雲臺峯近

遊陵與夫人雅民於雲臺白曰昇天見仙經

餐霞辟粒代乏松喬煮石蒸丹世無彭朔則何羨

乎陟山采藥泛海求師者之勤勤問津也予泣海州之明年戶

梟徒懲獷俗民稍安矣而雲臺懸海外枝峯蔓壑側碧斜青東

磊者又僻於清風之左麓延福之下方其羽流或太古衣冠或

空山鍾枝分門則別其子孫析地則私其農畝紫宮佇月掌玉

幾而道紀無人茅齋拔雲守化樂而洞天無主半千年末法之

道場非五百衆總持之正法也爰選名流與司香火非葛仙公

名聞東海抱朴難居非費長房朽索懸心山深莫住而金陵隱

仙庵主張變堂者清淨爲師太和爲友委駕於無欲指歸於無

爲其安心若操縵其學道若彈琴子使以蔡氏之五弄入成連之三山則東甌者安知非他日華陽之室金壇之庭乎夫鼈靈鑿硤力士開山水以龍靈地由人傑彈十二引水仙之操安八一引魚龍之變其方或必堂希聲者於吏治不無小補歟琴不期於濫觴號鐘曲不必乎陽春白雪以和平爲寬猛之音以宮角爲相悅之樂庶幾葛天之八闕義樂之扶來乎至於夏竦仙骨而道流惜其墮落李泌仙樂而世俗潑以葑莖僕亦將錫膏剔髓浣垢綠塵從先生於綠水青山爲風月主矣蕉堅之體而慕龍鳳之年朝菌之肥而求積朔之久知先生亦未必尹林之冲舉茅君之飛升耳釋名曰仙遷也遷入山也列子曰岱輿員嶠之山沈於大海則先生猶龍伯國之一人靈寘五百歲之春秋乎王平甫爲靈芝仙官石曼卿爲芙蓉城主僕主是州亦將